

**TAIM
BILONG
ATVEN
NA KRISMAS**

SANDE 1 BILONG ATVEN

1. RIT

Ais 2:1-5

*Akar dapanim: Ekiam, kantrin aviribar gumazamiziba akuvagh inigh mighsiar Godin
Dipenim tughav itimin mangi.*

Akar kam, Godin akam inigha izir gumazim Aisaia, an osiri.

God, Juda ko Jerusalem
gumazamiziba mikimasa, irebamin min
bizim uan akam isa Emosin otarim,
Aisaian aka. A ghaze.

Dughiatam gin otivtima, mighsiar
Ikiavira Itir Godin Dipenimin
tughav itim,

tugh bar gavgavigham.

Egh a pin mar iki mighsiar igharaziba
bar dagh afiragham.

Eghti kantrin igharazibar
gumazamiziba bar izi an uari
akuvagh ikiam.

Kantrin aviribar gumazamiziba izi
suam,

“Ia izi e Saionin mighsiamin
mavanangam, a Ikiavira Itir
Godin mighsiam.

Kar Jekopin Godin Dipenim.

E mangiti a uan arazir a ifongezibar
en sure damuam.

Egh a uabi misevezir tuavim, e an
gin mangam.”

Moses Osirizir Araziba, Saionin
mighsiamin ikegh mangiti
gumazamiziba a iniam.

Guizbangira, Jerusalem nguibam,
kar danganir Ikiavira Itir God
uan akam isi uan gumazamizibar
aningamim, eghti me azenan
mangi an akam akunam.

A jasin min ikia kantriba bar dar
gumazamizibar araziba tuisigh,
men osimtiziba deragh da akirti,
me uari nigh deragh ikiam.

Egh me uan midorozir sababa, da
misoghti,
da baravigh nguazibagh tuir ainbar
min otivigham.

Egh me uan afuziba misoghti,
da ikizirigh sabar azenibar
ingaribagh ami moghin,
otivigham.

Egh danganiba bar dar itir
gumazamiziba, uam uari
misoghan kogh ikiva, ua
midorozir arazibar sure damuan
kogham.

O Jekopin ovavir boriba, ia izi.
Ikiavira Itir God uan akar gavgaviba
isa uan angazangarimin min e
ganidi.

Da angazangarim min tuavim en
akakasi, egha an akar gavgaviba,
tuavim deravira en aka.

Eghti e akar gavgavir kabar gin
mangam.

Kar Godin Akam.

SAM

Sam 122:1-9

Ia akam ikaragh: E bar akuegha Ekiamin Dipenimin zui.

Ki orazi, me kamagh na migia ghaze,

“Ia dikavigh e mangi Ikiavira Itir Godin Dipenimin mangam.”

Ki kamagh oregha bar akonge.

E datirighin otivigha givagha,

Jerusalem nguibamin divazimin aven tuivighav iti.

Ia akam ikaragh: E bar akuegha Ekiamin Dipenimin zui.

Me Jerusalemin nguibamin ingarizi,
 a gavgavigha ganganim datirighin bar dera.
 God faragh Israelian anababav kemezi me iza kagh Ikiavira Itir God minabazi
 moghin,
 me datirighin izava ami.
 Danganir kam, atrivim kotiba barazir dipenim iti.
 Kar atrivim Devitin ovavir boribar kotiba baragha da tuisizir danganim.

Ia akam ikaragh: E bar akuegha Ekiamin Dipenimin zui.

Ia Jerusalem bagh Ikiavira Itir God ko mikim.
 Eghti a navir amirizim Jerusalemin iti darazir anighti,
 me navir amirizimin ikiva deragh ikiam.
 Gumamazir Jerusalemin divazimin aven itiba deragh ikiva,
 ua midorozim damuan kogham.

Ia akam ikaragh: E bar akuegha Ekiamin Dipenimin zui.

Ki uan adarazi ko, uan namakabagh nighnigha,
 kamaghin Jerusalem migia ghaze,
 “Ni amiragh nimira ikiti midoroziba nin aven otivan marki.”
 Ki, Ikiavira Itir God, en God, an Dipenim ginighnisi.
 Egha Jerusalem bar deraghvira ikiasa ki a bagha God ko migei.

Ia akam ikaragh: E bar akuegha Ekiamin Dipenimin zui.

2. RIT

Ro 13:11-14

Akar dapanim: Datirighin God ua e iniamin dughiam mong roghira ize.

Pol Romba bagha osirizir akinafarimin dibobonim.

Dughiar e datirighin itim, ia a gifo,
 kamaghin arazir ki ia mikemeziba ia
 dar amu. Kar dughiar ia daguraguim
 ategh dikavigh angamra ikiamim.
 Ia fo, fomira dughiar e nighnizir
 gavgavim Kraisin itim, koma God en
 akuraghamin dughiamin, aning mong
 uaningin saghon iti. Ezi datirighin
 God en akurvaghamin dughiar kam
 a roghira ize. Aminirbirim givasava
 amima, aminim tiasa. Kamaghin amizi,
 e mitatemin araziba bar dar ateghiva
 angazangarimin aven misoghsi
 midorozir biziba inigh dar aghuigh. E
 angazangarimin aruir gumazibar min
 deraghvira daruam. E dipar onganibar

amiva onganan kogh, egh pura
 gumamaziziba isi pamten dimiva ighiar
 kurabar arazibar amuan marki. Egh
 gumaziba ko amiziba pura tintinibar
 uari ko dakuva, afiar arazibar amuan
 marki. Egh uari uariv soghiva, egh
 munavin biziba bagh navim ikuvighiva
 da inisi navim isian marki. Egh ia uan
 Ekiam Krais Iesus arugh, mati gumazim
 midorozir biziba aghui. Ia uan navir
 ghurimin arazibagh nighnighiva, egh
 navir ghurimin ifongiam uam an gin
 mangan marki.

Kar Godin Akam.

WELKAMIM GUTNIUS

Aleluya, Aleluya.

Ekiām, nī uan apangkuvim en akagh, egh en akuragh uam e inigh.

Aleluya.

GUTNIUS**Mt 24:37-44**

Akar dapanim: Ia uari akir mizuam iki.

Ia, Krais Iesusin Akar Aghuir Matyu osirizim, a baragh.

Ezi bizir Noan dughiamin otiviziba, da uaghan Gumazibar Otarim izamin dughiamin otivam. Dipar ekiar nguazim bar anevarazim tighar izamin dughiamin, gumazamiziba apava, dipar onganiba apava, egha amuiba ko pabar iti. Me kamaghin amua ikiav itima, Noa kurimin aven ghu. Me bizir me bativamin tam gifozir puvati, egha pura ikiav itima, aperiar ekiam otogha bar me avaragha me avigha ghue. Gumazibar Otarim izamin dughiam, uaghan kamaghirama otivam. Gumazir pumuning azenimin ikiti, God tav inighti, tav ikiam. Amizir pumuning bretbar amusi flaua mirmiriva ikiti, God tav inighti, tav ikiam.

“Kamaghin amizi, ia deragh gan iki. Ian Ekiām izamin dughiam, ia a gifozir puvati. Ia arazir kam ginighnigh. Gumazir manam, okimakiar gumaziba dimagarimin izava an dipenim akarasava amima, a men dughiam gifogha, egha men arafa. Egha me ataghizi me an dipenim akarizir puvati. Kamaghira, ia uaghan aravagh iki gan. Guizbangira, dughiar ia Gumazibar Otarim mizuaman koghamim, a dughiar kamram otogham.”

Kar, Krais Iesusin Akar Aghuim.